

**Kalaallit Nunaanni nunaqarfinni tamani ingerlatsinissamut akuersissuteqarfiullutik
qulimiguulinnut mittarfinnik pilersitsinissamut, pioreersunillu
aserfallatsaaliuinissamut, kingusinnerpaamik UKA2026-mut, Naalakkersuisut
sanaartornissamut pilersarusiornissaannut (projektering) peqquneqarnissaannik
Inatsisartut aalajangiiffigisassaattut siunnersuut**

Inatsisartunut ilaasortaq Jens NapātôK', Naleraq

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISSUTAA

Sanaartornermut Ataatsimiititaliap suliarinninnermini ukuninnga inuttaqarpoq:

Ataatsimiititaliap suliarinninnermini ilaasortarai:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Gerth Mikaelson, Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Nivi Heilmann Efraimsen, Inuit Ataqatigiit
Inatsisartunut ilaasortaq Bentiaaraq Ottosen, Atassut

UKA 2025-imi ulloq 21. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaanni nunaqarfinni qulimiguulinnut mittarfinnik pilersitsiffigineqarnissamik
pisariaqartitsineq akuersissuteqareersunullu nutarsaasoqarnissaanut ullutsinnullu

naleqquttumik ataqatigiissaarisoqarnissaanik aalajangiiffigisassatut siunnersuuteqarnermi siunertarineqarpoq. Nunaqarfiit arlaqartut qulimiguulinnut mittarfeqanngitsut imaluunniit naammaginangitsumik illuuteqartut tikkuarpaa, tamanna pingaartumik ukiukkut angallannermut, peqqinnissakkut sullinneqarnikkut allatigulluunnit inuiaqatigiinni sullissinneqarnissamut killilersuisuusoq.

Assersuutigalugu taaneqarsinnaapput: Kangerluk, Nutaarmiut, Qeqertarsuatsiaat, Nuugaatsiaq, Kangaamiut, Naajaat, Qeqertat, Atammik, Kapisillit, Oqaatsut, Saarloq, Igaliku, Napasoq, Qassiarsuk, kingullertullu Illorsuit.

Naalakkersuisut kingusinnerpaamik UKA2026-mut qulimiguulinnut mittarfinnik pilersitsinissamut, pioreersunillu aserfallatsaaliuinissamut, ingerlatsinissamut akuersissuteqarfiullutik sanaartornissamut pilersaarusiornissaannut (projektering) peqquneqarnissaannik Inatsisartut aalajangiiffigisassaattut siunnersuummi siunertarineqarpoq, taamaalillutik Inatsisartut paasisutissanik pisariaqartinneqartunik toqqammaveqarlutik aalajangiisinnaaniassammata.

Siunnersuutip Inatsisartuni siullermeerneqarnera

Nuna tamakkerlugu angallannerni pingaartumik nunaqarfinni isorliunerusunilu ukiup annersaani angallannerni silaannakkut angalaneq kisiartaalluni aqqutissaasarmat, isumannaatsumik patajaatsumillu angallannerup qulakkeerneqarnissaata pingaaruteqassusia siunnersuutip Inatsisartuni siullermeerneqarnerani isumaqataaffigilluarneqarpoq. Attaveqaasersuutitigut, peqqinnissaqarfimmit sullinneqarnermit upalungaarsimaniarnermilu assigiimmik atugassaqartitsinissaq qitiutinneqartariaqartoq oqaaseqartunit arlalinnit erseqqissaassutigineqarpoq.

Peqatigitillugu partiinit arlalinnit Inatsisartunit aalajangiunneqarsimasut nutartikkamik pisariaqartinneqartunillu paasisimasaqarluarnissaq, pingaarnersiuisoqarnissaa aningaasatigullu kingunissaanik toqqammaveqarnissaq pingaartinneqarpoq. Tassunga ataatillugu qulimiguulinnut mittarfiit pillugit Mittarfeqarfiit 2022-mi nalunaarusiarineqartoq Naalakkersuisunit innersuussutigineqarpoq, ukiunullu atuuffiusunut naleqquttumik aalajangiisoqarnissaa qulakkeerniarlugu nalunaarusiaq nutarterneqarnissaa siunnersuutigineqarpoq.

Tamanna tunngavigalugu Naalakkersuisut allannguutissatut siunnersuummik tulliuttumik saqqummiussaqrput:

Qulimiguulinnut mittarfinnik pilersitsinermi aammalu ingerlatsinissamut akuersissuteqarfiusunik iluarsaassinermi aningaasartuutissat ullutsinnut naleqquttumik ilisimalernissaannut, qulimiguulinnut mittarfiit pillugit Mittarfeqarfiit nalunaarusiaa 2022-meersoq nutarteqqullugu Naalakkersuisut peqquneqassasut pillugu Inatsisartut aalajangiiffigisassaattut siunnersuut.

*Nalunaarusiap nutarterneqarnera UKA2027-mi Inatsisartunut
saqqummiunneqassaaq.*

Naalakkersuisut allannguutissatut siunnersuuteqarnerat partiinit arlalinnit taparserneqarpoq, siunnersuullu Sanaartornermut ataatsimiititaliamut suliarineqartussanngorlugu innersuunneqarpoq.

Siunnersuutip aningaasatigut kingunerisassai

Inatsisartut Suleriaasianni § 33, imm. 1-imi aalajangersarneqarpoq aalajangiiffigisassatut siunnersuutip timitalerneqarnerata aningaasatigut allaffissornikkullu kingunerisassai siunnersuummut tunngavilersuutini allaaserineqarsimassasut.

Piviusunngortinneqarnissaannut aningaasatigut allaffissornikkullu kingunerisassat allaanneqarsimapput siunnersuuteqartup tunngavilersuuteqarnermini sanaartugassanik pilersaarusiornermut sulineranut qitiusumik aqutsisoqarfimmi AC-tut ilinniarsimasup ukiut marluk atorumaarai siunnersuuteqartup tunngavilersuuteqarnermini naliliisimasoq ataatsimiititaliamit maluginiarneqarpoq. Aammattaaq siornatigut missingiutit innersuussutigineqarput, nunaqarfinnut aalajangersimasunut qulimiguulinnut mittarfinnik ataasiakkaarlugit pilersitsinissaanut 3–6 mio. kr.-iusut, siornatigullu nutarsaanissamut pisariaqartinneqartut katillugit siornatigut 11 mio. kr.-nit missaanniittussatut nalilerneqarsimallutik.

Naalakkersuisut allannguutissatut siunnersuutaanni sanaartornissamut aningaasaliissutinik malitseqanngimmat, illuatungaaticullu maannakkut sanaartugassatut pilersaarusiukkat nutarsarnissaat naliliinissamullu tunngavissat ataatsimiititaliamit maluginiarneqarpoq. Taamaammat allannguutissatut siunnersuutip aningaasatigut kingunerisassai allaffissornikkut, nalunaarusiornissamut attuumassutilinnut sulianut, immaqalu avataaniit suliamut ilisimasalimmik akuutitsilluni ikiorteqarnissamut sulisoreriikkallu atorlugit ataqatigiissarisooqarsinnaasoq nalilerneqarpoq.

Ataatsimiititaliap siunnersuummut oqaaseqaatai

Isumannaatsumik patajaatsumillu toqqissisimasumik nunalu tamakkerlugu assigiimik silaannakkut angallassinerit ingerlanneqarnerisa ataqatissinnissaa aalajangiisusooq ataatsimiititaliamit isumaqatigineqarpoq. Nunaqarfinni killilimmik qulimiguulinnik angallanneqarnissamik imaluunniit angallanneqarnissamik periarfissaqanngivissut, suliniutit ingerlateqqinneqarnissaanni pingaartillugit suliat ingerlanneqarnissaat ataatsimiititaliamittaaq pingaarluinnartutut isigineqarpoq.

Peqatigitillugu ataatsimiititaliamit pingaartinneqarpoq, sanaartornermut aningaasaliissutit pillugit Inatsisartunit aalajangiunneqartut nutaanik tunngaveqartunik piviusorsioortumillu tunngaveqarnissaat. Taamaammat ataatsimiititaliaq siunertamut tulluuttutut isigaa,

Mittarfeqarfiit 2022-mi nalunaarusiarisimasaat nutarsaanermi aallaaviussasoq, taamaalilluni pisariaqartinneqartut nuna tamakkerlugu aningaasatigullu kingunerisassai ataqatigiissillugit nalilerneqartariaqartut.

Nunaqarfiit qulimiguulinnut mittarfiisa akornanni suleqatigiinnerat silaannakkullu angallannerup tamarmi maanna Mittarfinni ingerlasunut pilerumaartunullu isummerfigineqartariaqartoq ataatsimiititaliamittaaq maluginiarneqarpoq.

Ataatsimiititaliap inassuteqaatai

- Ataatsimiititaliap isumaqatigiittup Naalakkersuisut allannguutissatut siunnersuutaata akuerineqarnissaa innersuusstigaat.

Taamatut oqaaseqaateqarluni isumaliutissiisummilu allassimasutut paasinnilluni
ataatsimiititaliap siunnersuut aappassaaniigassanngortippaa.

Justus Hansen
Siulittaasoq

Gerth Mikaelen
Siulittaasup tullia

Jørgen Rosbach

Nivi Heilmann Efraimsen

Bentiarag Ottosen